

2 Timothy

Roube'aten Ana Tur

Paul ana fef bairou'abin Timothy isan kikirum an gagamin i Timothy ana tur anayabin Timothy i orot boubun naatu i natun na'atube ana baibaisayan. Tur an gagamin i wainaben ana tur Timothy isan. Paul Timothy ana binan iu koufair itin nabosunusunub Jesu Keriso isan naorereb, naatu bai'obaiyen tur anababatun tur gewasin nabukikin na'atube Buk Atamanin ana bai'obaiyen ana tur auman nabukikin bai'obaiyen orot na'atube sabuw ni'obaibiyih naatu tur binanuyan ana orot na'atube nabinan bai'akir roukoukuwen kakafin wanawanan.

Paul Timothy imatanuw yare fokarih wanawanan nahaiw natit naatu baifufuwen gamin kwanekwan wanawanan men narun nikofanah anayabin tur hai yabih en boro men ana gewasin ta sabuw nitih, baise sabuw hinonowar boro makakaf nitih.

Tur it etei eo in wanawanan Timothy nuhin kusib Paul taiyuwin ana yawas naatu ana not ana baitumatum, ana yatenub, ana wainaben, ana baitafofor Timothy i'obaiy.

Fef wanawanan tur iti na'atube hi'asgidigid

Roube'aten ana tur (1.1-2)

Bora'ara'aten naatu gewasin sinaf isan ana fefeyan (1.3–2.13)

Yamutufuren naatu baimatnuwen (2.14–4.5)

Paul ana ma yawas (4.6-18)

Tur yomanin (4.19-22)

Keriso Ana Bowayan Gewasin

1 ¹Ayu Paul Jesu Keriso ana tur abarayan, God ana kokomaim iyunu atit Keriso Jesu wanawananaaim yawas wanatowan eo'omatanit i ao'orereb. ²^aIti fef o Timothy isa akikirum, ayu natu au yabow, isa

^a 1.2 Act 16.1; 1Tim 1.2

ayoyoyoban manaw kabeber, baiwanbabanen, tufuw, God Tamat naatu Jesu Keriso ata Regahane isa nama.

Merarayow Naatu Koufair

³^bAyu God isan abowabow au not wanawaninan men ana kwarisin ta auman, baise turobe'emaaim ana merar ayiy, uwai'nah hisisinaf na'atube. Au yoyobanamaim fai mar o anuhi God ana merar ayiy. ⁴O matur re'er i anotanot, fai mar etei au kok gagamin i mi'itube ata'iti maiye, saise atiyasisir. ⁵^cO a baitumatum turobe isan i mar etei nuhu ekukusib, nati baitumatum i wantoro'ot o uwat Lois, naatu o hinat Eunice hairi hibitumatum, boun i ayu aso'ob anababatun o auman nati baitumatum ta'imon kubitumatum. ⁶^dAnayabin iti isan o nuhi akukusib, ayu umau tafa ayayara'ah ana veya God ana usar bit inababin maiye na'in nato'ab. ⁷^eAnayabin God Anunin bitit i men baibiruwit isan ititamih, baise Anun Kakafiyin bitit i fair, yabow naatu yawas rumutumutufurin bow isan itit.

⁸Isan imih Regah ana tur orereb isan men biya na'ohow, na'atube ayu dibur ama'am isan men biya na'ohow, baise Tur Gewasin isan ayu biyau ebababan na'atube, obo aunowa biya nababan God fair ebit na'atube. ⁹^fI iyawasit naatu afa'af kakafiyinamaim eafit tana yasairit ana sabuw nowanamih tamatar, ea'afit i men it ata bowabow gewasin tabowabow imaim itin eafitamih, baise i taiyuwin ana kokomaim naatu ana manaw ana kabeberamaim Jesu Keriso i'obaiyit ta'itin. Iti i marasika tafaram aneika yikitifuw. ¹⁰^gNaatu boun ata baiyawasenayan Jesu Keriso nan ana veya sawar etei isat hirerereb, morob ana fair e'asabun naatu Tur Gewasinamaim yawas wanatowan i'obaiyit na irerereb.

¹¹^hAyu i kob abarin naatu Tur Gewasin sabuw bai'obaiyih isan God rubinu, ¹²anayabin iti isan ayu biyababan gagamin abaib. Baise biyababan abaib isan men biyou eo'ohowamih, anayabin ayu yait abitumitum i aso'ob, i boro ana fair natafafaru Tur Gewasin bitu anabotan nan yomanin ana Veya natit.

¹³Tur anababatun abi'obaiyi inabukikin, mar etei nati bi'obaiyen ini'ufunun, naatu baitumatum, yabow Keriso Jesu bitit i wanawanamaim nama. ¹⁴ⁱGod Anun Kakafiyin it wanawanatamaim ema'am i ana fairamaim sawar gewasih hitutumi hibit ina tafafar gewas.

¹⁵Inaso'ob^j sabuw Asia wanawaninan hima'am etei ayu hihamiyu, na'atube Figelus naatu Hermogenes hairi auman ayu hihamiyu.

¹⁶Ayoyoyoban Regah mi'itube Onesiporus ana nibur bairi nakabibirih, anayabin mar etei ena ayu koufair ebitu, naatu dibur ama'am isan men kafai biyan eo'ohow. ¹⁷Baise na Rome titit ana veya

^b 1.3 Act 23.1 ^c 1.5 Act 16.1 ^d 1.6 1Tim 4.14 ^e 1.7 Rom 8.15 ^f 1.9 Eph 2.8-9; Tit 3.5
^g 1.10 Heb 2.14 ^h 1.11 1Tim 2.7 ⁱ 1.14 1Tim 6.20 ^j 1.15 Kirisiyan

ana kok i mi'itube ayu ta'itu, imih nuwuhu nan ayu titauru itu. ¹⁸Ayu ayoyoyoban mi'itube Regah baibatebat ana Veya iti orot takabibir, anayabin Ephesus imaim ayu isau bowabow gagamin maiyow bow bibaisu o iso'ob, o men kukakasiyomih.

Keriso Jesu Ana Bowayan Gewasin

2 ¹Baise natu, Keriso Jesu ana manaw ana kabeber wanawananaaim inafair. ²Bai'obaiyen sifrubonayah maumurih nahimaim abinan inonowar inab, naatu sabuw iyab kubitutumih, iti tur inaya'abun hinab, saise i auman sabuw afa hini'obaiyih. ³^kAki biyai ebababanabe obo auman aunowa biya nababan Keriso Jesu ana baiyowayan gewasin na'atube. ⁴Orot yait sorodiy ana bowabowamaim ema'am i boro turobe nabow ana orot ukwarin niyasisir, men natit ufun bar merar ana bowabow auman nagamuw nabowamih. ⁵^lOrot nunuw isan ebowabow gaigwas boro men asir nanunuw turahinah ni'iyonsairih siwar nabaimih, baise nunuw ana bai'obaiyen hibi'obaiy ni'ufunun boro nanunuw turahinah ni'iyonsairih. ⁶^mOrot yait masaw bow raro'on ebababan hinafafour ana veya, nati orot i boro wan hinakusib aunowan hinitin. ⁷Abisa ao i nuhimaim nama inanot, naatu Regah boro nibaisi nuhi nakusisib sawar etei ao inaso'ob.

⁸ⁿJesu Keriso, David uwan, morobone God iyawas maiye mimisir, i ayu au Tur Gewasin ukwarin nati i abibinan. ⁹^oAnayabin ayu Tur Gewasin abibinan isan biyababan abaib, ana itinin i bainowan orot na'atube hifatumu ama'am. Baise God ana tur i men hifatum. ¹⁰Isan imih God ana sabuw rurubinlh wabihimaim ayu biyababan fokarih etei wanawanah arun ewawainabu, saise i auman Keriso Jesu'une yawas enan hinab naatu yawas ma'ama wanatowan ana bonamanamarin wanawanah hinarun.

¹¹ ^pIti tur i turobe,

“I bairi tanamomorob na'at,
boro bairi yawasit tanama,

¹² ^qbiyababanamaim nawawainabit na'at,
boro bairi tani'aiwob.

Naatu tanayayaub na'at
i auman boro nayaubit.

¹³ ^rIt men tanabobosunusunub na'at,
i boro nabosunusunub it isat

anayabin i men karam boro taiyuwin nifuwifuw.”

^k 2.3 2Tim 1.8 ^l 2.5 2Tim 4.8 ^m 2.6 1Cor 9.7 ⁿ 2.8 Rom 1.3; 1Cor 15.4 ^o 2.9 Eph 3.1, 13; Php 1.12-14 ^p 2.11 2Cor 4.11 ^q 2.12 Mat 10.33 ^r 2.13 Rom 3.3-4; Tit 1.2

God Orot Ana Bowabow Isan Ebibasit

¹⁴ *s*A sabuw hai tur ina'owen nuhih inakusib iti sawar isah, God nanamaim tur fokarin ina'uwihi inimatnuwih; sawar hai yabih en, isah men turamaim hinagam. Nati boro men ana gewasin ta hinab, baise sabuw iyab tur tenonowar i tigugurusih. ¹⁵ *t*Baise inabow sunusunub, God na'iti o i turobe kubowabow, naatu God ana tur yabin inaso'ob gewas sabuw ini'obaiyih, saise kubowabow isan God nabibatiy boro men biya na'ohow. ¹⁶ *u*Sabuw iyab God men tekakakafiy naatu koko'awabe teo'okwanekwan kwanahaiwih, anayabin sabuw boro hinanawiyih God biyanamaim hinatit hai ef nawarorom. ¹⁷ *v*Hai bai'obaiyen i roufair orot biyan ean gegedor enan na'atube. Wanawanahimaim i orot rou'ab, Haimeneus naatu Philetus hairi iti bai'obaiyen tibi'obaiyi i kwana'itin gewas. ¹⁸ Iti orot rou'ab bai'obaiyen anababatun hikwahir hitit, naatu hai binanumaim hio morobone misir maiye i mataraka, boro men namatar maiye'emih, iti na'atube hio baitumatumayah afa hai baitumatum tigugurus. ¹⁹ *w*Baise God ana taf badowanin rarouw i boro men yait ta niyuyuw. Iti taf afe'enamaim tur iti hikirum, "Regah so'ob iyab i nowan." naatu "Iyab teo ayu i Regah nowan gewasin kakafihine dogor baikitabir hinab."

²⁰ Bar gagamin wanawanan ror kafet, hai yumat i ta ta, afa i *silver*, naatu afa i *gold*, afa i tew, afa i naukwat, naatu iti sawar afa i bowabow gagamih isah, afa i bowabow gidigidih isah. ²¹ Orot yait kakafihine nahaiw taiyuwin nakukusouw na'at, karam boro hinab sawar gagamih isan nabow, anayabin i taiyuwin ya'asair ana orot ukwarin isan bowamih yabuna.

²² *x*Monok ana yawas kwanahaiw, yawas yamutufurin, baitumatum, yabow, tufuw, isah a not imaim kwanayai kwananuwih kwanab, Kirisiyan afa dogoroh rousouwin bairi kwanita'imon Regah ana baibais isan kwanifefeyan. ²³ *y*Baise sabuw hai not en koko'aw sabuw na'atube kwanahaiwih; kwanaso'ob nati sabuw i gamin baibuya'ayah. ²⁴ Regah ana akirwairafrin i men nagam kwanekwan, baise sabuw etei isah nigewasin, yaten nanub ni'obaiyih. ²⁵ Tur hamehamenamaim sabuw iyab i tirurukoukuw nayamutufurih, God boro hai ef niwa'an naham dogor baikitabir hinab naatu hinan turobe hinaso'ob. ²⁶ Naatu hai not namatabir maiye nan natitit ana veya'amaim, demon buwih fatumih hima fanan hibai ana kok hisisinaf boro hinahaiw hinatit.

^s 2.14 1Tim 6.4; Tit 3.9 ^t 2.15 1Tim 4.6 ^u 2.16 1Tim 4.7 ^v 2.17 1Tim 1.20

^w 2.19 Num 16.5; Isa 52.11; Jn 10.14; 1Cor 8.3 ^x 2.22 1Tim 6.11 ^y 2.23 1Tim 4.7

Mar Yomanin

3 ¹^aAbimatnuwi inaso'ob, mar yomanin nakakabom, yawas boro nafokar, ²sabuw boro taiyuwih akisih isah hinabow, hinikabat, hinao ra'ara'at, hini'o'orot; awah nafokar, hinah tamah fanah hinasar, aurih merarayow en, naatu kauh boro God hinitin, ³yabow en, tounuw en, kautabitabir, tafa'asar, yaso'ar, gamin boro hinamatar, naatu yawas gewasin isan boro hinibobowen. ⁴Turahinah babah hinao, yateh nakabiy, dogoroh wanawanah boro men bir kakaf nama, bai'o'orot awan nakaratan; biyah ana yasisir isan boro nara'at, naatu God boro men hiniyabuw, ⁵^aufuhine hai itinin i Kirisiyan sabuw na'atube, baise wanawanah hai itinin turobe ana fair i hikwahir, nati sabuw i kwanahaiwih.

⁶Anayabin Orot afa sabuw hai bar hirun baibin bowabow kakafin ta ta, biyah ana naniyanamaim nawiyih hisisinaf fatumih hima'ama, hibow bai'obaiyen ta hi'obaiyah naatu turobe ana ef hihamiy. ⁷Nati baibin i mar etei hisisinaftobon turobe hitaso'ob isan, baise bai'obaiyenayah hi'obaiyah kakakaf, turobe men hinaso'ob. ⁸^bJannes naatu Jambres hairi Moses isan hibirakit na'atube, iti orot auman turobe isan tibirakit, hai not kakafinamaim turobe hibotabir baitumatum tigugurus. ⁹Baise boro men manin hinabowamih, anayabin hai baikoko'aw hinabiwa'an boro bebeyan sabuw hina'itin. Jannes naatu Jambres hairi biyah mamatar na'atube.

Tur Yomanin

¹⁰Baise o i ayu au bai'obaiyen iso'ob, au yawas mi'itube ama abowabow iso'ob. Abis isan ayakitifuw abowabow iso'ob, au baitumatum, au yatenub, au yabow, au biyababanamaim wawainabu, ¹¹^cau roukaukuwenamaim, naatu au bai'akiramaim o iso'ob. Naatu sawar abisa'awat Antioch, Ikonium naatu Lystra imaim isolu himamatar iso'ob; roukoukuwen kakafin anababatun abai wainabu. Baise Regah God iti kakafihine botaitu atit. ¹²^dTurobe, sabuw iyab Kirisiyan ana yawasamaim hinama Keriso Jesu hinabi'ufunun boro hinarukoukuwih. ¹³Baise sabuw kakafih naatu iyab tebowabow hai itinin i turobe sabuw na'atube, i kakafin hisinap tenan boro hinan hinarouwabon, ana itinin i taiyuwih hifufuwih naatu turahinah auman tibifufuwih. ¹⁴Baise o, turobe men inabohamiy, abisa abi'obaiyi inabukikin initumitum. Iso'ob iyabowat o abai'obaiyenayah, ¹⁵naatu inanot o kek ana veya na boun God ana tur kakafiyin hikikirum etei iso'ob, iti tur i karam boro not nit ukwar narerekab nabonawiy Keriso Jesu initumitum yawas inab. ¹⁶^eTur etei i

^z 3.1 1Tim 4.1 ^a 3.5 Mat 7.15, 21; Tit 1.16 ^b 3.8 Exo 7.11 ^c 3.11 Act 13.14-52; 14.5, 8-20 ^d 3.12 Mat 16.24; Jn 15.20; Act 14.22 ^e 3.16 Rom 15.4

God Anunin Kakafiyin iwanih hikirum naatu turobe bai'obaiyen isan i gewasin, ata ma menamaim ebibibir nakwararit narumutufur, kakafih nayai gewas, naatu ma gewas isan ni'obaiyit tanama gewas. ¹⁷Saise orot yait God isan ebowabow bai'obaiyen tutufin nab an uman etei nasusuw bowabow ta ta etei nabow gewas.

4 ¹God nanamaim naatu Keriso Jesu nanamaim tur fokarin au'uwi, Keriso i boro enan sabuw yawayawasih naatu murumurubih nibabatiyah, naatu enan anayabin i ni'aiwobomih, imih tur fokarin ao abiyuni, ²inabat kikin inao'rereb tur gewasin inabinan, veya gewasin hamehamen ana veya o veya kakafin fokarin ana veya inao'rereb hinaso'ob gewas, abisa hinasisinaf kakaf isan ina'uwihi, inayamatufurih, naatu koufair initih, yatenanub God ana turamaim inituwih. ³Veya enan sabuw iti bai'obaiyen gewasin boro hinakwhir, naatu tur i hai naniyan ekokokomaim boro hinan, bai'obaiyenayah maumurih na'in hinabow tur i hai kokomaim bai'obaiyenayah hinabinan hinama hinanowar. ⁴Tur anababatun isan tainih boro hinagibud naatu binanakwar mumunih isah tainih boro hinabotawiy. ⁵Baise o, sawar fokarih ta ta tenan wanawanahimaim inabatkikin, biyababanamaim nawainabi. O a bowabow i Tur Gewasin inabinan sabuw Keriso hinasu'ub, naatu a bowabow etei inabow yomanin ina'asa'ub, God ana akirwairafin na'atube.

⁶Anayabin ayu biyau sibor na'atube ya'in isan ana veya i natit; naatu ayu tafaram baihamiyin isan au veya i nakabom. ⁷Ayu baiyow gewasin ai yow anunuw ana yomanin atit naatu au baitumatum abotan, abisa ao'omatan imaim ama yomanin abisawar. ⁸Naatu boun i baigegsairen ana siwar ayu isau tebotan, yamutufuren ana kowas, Regah ana baibatiyen mutufurin boro Baibatebat ana Veya nitu, men ayu akisu, baise iyabowat i ana matabir isan yabowamaim hima tekakaif auman boro nitih.

O Akis A Tur

⁹Inasinaftobon iti boro'omo inan biyau inatit, ¹⁰anayabin Demas iti tafaram isan iyabow kwanekwan; ayu ihamiyu anababatun tit in Thessalonica. Crescens au Galasia in, naatu Titus au Dalmatia in. ¹¹Luke akisinamo airi ama'am, o namih Mark inab airi kwanan, anayabin i boro nibaisu au bowabowamaim airi ana bow. ¹²Tychicus i ai yafar au Ephesus in. ¹³^kO inan ana veya au biyabaibyon tafan Troas bar meraramaim Carpus biyan ai hamiy inu'in inab auman inan. Naatu buk auman inabow inan, buk nati for kanabihimaim hikirum i au kokok gagamin nati buk auman inabow inan.

^f 4.3 1Tim 4.1 ^g 4.6 Php 2.17 ^h 4.7 1Tim 6.12 ⁱ 4.8 1Cor 9.24-25 ^j 4.10-11 Act 15.37-39; 2Cor 8.23; Col 4.14 ^k 4.13 Act 20.6

¹⁴^lAlexander metal bowayan biyababan gagamin maiyow ayu itu, abisa ayu isou sisinaf Regah boro ana baiyan nitin. ¹⁵Imih o abimatnuwi, mata toniwa'an nati orot isan. Anayabin it ata tur ata binan tao isan i gam ebi'aw ase'as. ¹⁶Wantoro'ot ayu taiyuwu awawasfafaru ana veya men yait ta ayu au kou bat, etei ayu hihamiyu, God mi'itube abisa hisisinaf isan men imaim tibatiyih. ¹⁷Baise Regah ayu au kou bat fair itu, imih ayu fair abai tur etei a binan Eteni Sabuw hinowar; naatu farubarubar awanane Regah botaitu atit. ¹⁸Regah boro moromorob kakafih tata'ane natafafaru naatu yawas nitu nabonawiyu i ana aiwob no maramaim ana run. Isan imih mar etei bora'ara'aten abitin wanatowan, wanatowan! *Amen*

Yomanin Ana Merarayow

¹⁹^mPriscilla naatu Aquila hairi hai tur ina'owen, hai merar ayiy na'atube Onesiporus ana nibur bairi auman hai merar ayiy. ²⁰ⁿErastus i Corinth ema'am, Trofimus sawow imih Miletus imaim ai hamiy ema'am. ²¹O inasinaftobon inan inatitabo rarab siba'u ana veya nabusuruf. Eubulus a merar eyey, na'atube Pudens, Linus naatu Claudia auman a merar tiyyi, naatu taituw iti'imaim tema'am auman a merar tiyyi.

²²Regah ayub nigegewasin, naatu manaw kabeber Regahane kwa etei isa nama.

^l 4.14 Isa 59.18; Rom 2.6 ^m 4.19 Act 18.2; 2Tim 1.16-17 ⁿ 4.20 Act 19.22; 20.4; Rom 16.23